



Sumáriu Kazu
Tribunál Distritál Baucau
Edisaun Dezembru 2018

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida. JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba violénsia hasoru feto.

A. Sumáriu prosesu julgamentu kazu iha Tribunál Distritál Baucau

1. Totál kazu ne'ebé JSMP monitoriza: 21

Artigu	Tipu Kazu	Númeru
Artigu 145 (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	13
Artigu 154 (KP)	Maus tratus ba kónjuje	1
Artigu 257 (KP)	Abuzu konfiansa agravadu	1
Artigu 259 (KP)	Danu agravadu	2
Artigu 243 (KP)	Obstrusaun ba autoridade publika	2
Artigu 207 (KP)	Kondusaun sein karta	1
Artigu 23 (KP) & artigu 139 (KP) artigu 20 nu.1 hosi lei arma brankas Nu. 5/2017.	Omisídiu agravadu ho forma tentada no armas brankas	1
Totál		21

2. Totál desizaun ne'ebé JSMP monitoriza: 18

Tipu desizaun	Númeru
Pena prizaun (Artigu 66)	1
Suspensaun ba prizaun nia ezekusaun (artigu 68 KP)	14
Pena multa (artigu 67 KP)	2
Absolve	1

3. Totál kazu ne'ebé sei kontinua prosesu tuir JSMP nia monitorizasaun: 3

Deskripsaun sumáriu ba desizaun kazu sira ne'ebé JSMP monitoriza:

1. Krime ofensa ba integridade física simples ho natureza violénsia doméstika

Nú. Prosesu	: 0002/17.LALMAR
Kompozisaun Tribunál	: Singular
Juis	: Dra. Ersilia de Jesus
Prokuradór	: Dra. Ivonia M. Guterres
Defeza	: Dr. Antonio Fernandes
Tipu pena	: Pena prizaun fulan 6 suspende ba tinan 1

Iha 3 Dezembru 2018, Tribunál Distritál Baucau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu MASP hasoru nia feen, iha Distritu Lautem.

Akuzasaun prokuradór

Prokuradór akuza katak iha 2 Agostu 2017, tuku 20.00 kalan, arguidu tata dala rua iha lezada nia kotuk laran. Aktu ne'e rezulta lezada sofre mean no bubu iha lezada nia kotuk laran.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu deklara katak faktu ne'ebé prokuradór akuza ba nia ne'e loos hotu, arguidu diak malu ona ho lezada, arrepende ona nia hahalok akontese, to'o agora arguidu la baku ona lezada, no foin primeiravés mai hatan iha tribunál. Iha parte seluk lezada konfirma faktus hotu iha akuzasaun no deklara katak depoisde akontesimentu ne'e to'o agora arguidu la baku ona lezada.

Alegasaun final

Prokuradór konsidera arguidu provadu komete krime hasoru lezada bazeia ba konfisaun arguidu nian no deklarasaun hosi lezada. Tanba ne'e husu ba Tribunál atu kondena arguidu ho pena prizaun fulan neen suspende ba tinan ida.

Enkuantu defeza haktuir katak arguidu konfesa faktus hotu iha akuzasaun, arrepende ona nia hahalok, diak malu ona ho lezada. Tanba ne'e husu ba tribunál aplika pena ne'ebé adekuadu ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun fulan neen suspende ba tinan ida.

2. Kondusaun sein karta

Nú. Prosesu : 0060/18.BCSTR
Kompozisaun Tribunál : Singular
Juis : Dr. Jose Goncalves
Prokuradór : Dra. Ivonia M. Guterres
Defeza : Dr. Antonio Fernandes
Tipu pena : Pena multa

Iha 3 Dezembru, Tribunál Distritál Baucau prezide julgamentu leitura sentensa ba krime kondusaun sein karta ne'ebé envolve arguidu Rogerio Freitas da Cruz hasoru Estadu RDTL, iha Suku Tirilolo, Sub-distritu Baucau, Distritu Baucau.

Akuzasaun Prokuradór

Prokuradór akuza katak iha 29 Jullu 2018, tuku 08.00 dader, arguidu kondus motor meo ho sapa matrikula E 3402 Tls, iha dalan publiku no soke kareta mikrolet ida. Wainhira polisia to'o iha fatin akontesimentu hodi pasa revista no hetan katak arguidu laiha karta kondusaun.

Prokuradór akuza arguidu kontra artigu 207 Kódigu Penál kona-ba krime kondusaun sein karta.

Produsaun ba prova sira

Iha prosesu julgamentu, arguidu uja direitu nonok. Enkuantu testemuña Carlos Freitas Cabral nu'udar polisia tranzitu, depoimenta katak iha akontesimentu ne'e mosu asidente kareta ho motor soke malu, nune'e testemuña ho nia maluk sira desloka kedas ba fatin akontesimentu hodi pasa revista no hetan katak arguidu laiha karta kondusaun.

Alegasaun final

Prokuradór haktuir katak bazeia ba produsaun ba prova arguidu provadu komete krime kondusaun sein karta, arguidu hatene hela katak la iha karta kondusaun maibé konduz motor iha estrada publiku. Tanba ne'e husu ba tribunál atu kondena arguidu ho pena prizaun tinan rua suspende ba tinan tolu.

Enkuantu defeza haktuir katak iha julgamentu arguidu hili direitu nonok, mezmu nune'e testemuña konfirma, tanba ne'e husu ba tribunál aplika pena ne'ebé adekuadu ba arguidu.

Desizaun

Tribunál prova katak arguidu komete duni krime tuir faktu sira iha akuzasaun. Bazeia ba prova sira ne'e, tribunál kondena arguidu ho pena multa US\$60.00 ne'ebé sei selu 0.50 kada loron durante loron 30. Tribunál mós fiksa pena alternativa durante loron 40 prizaun, wainhira arguidu la kumpri pena multa refere.

3. Krime maus tratus ba kónjuje

Nú. Prosesu : 0005/17. LALMR

Kompozisaun Tribunál : Koletivu

Juis : Dr. Afonso Carmona
Dra. Ersilia de Jesus
Dr. Hugo da Cruz Pui

Prokuradór : Dr. Luis H. Rangel da Cruz

Defeza : Dr. Jose M. Guterres

Tipu pena : Pena prizaun tinan 2 suspende ba tinan 2

Iha 5 Dezembru 2018, Tribunál Distritál Baucau prezide julgamentu leitura akordaun ba krime maus tratus ba kónjuje ne'ebé envolve arguidu JdO hasoru nia feen, iha Distritu Lautem.

Akuzasaun Prokuradór

Prokuradór akuza katak iha 19 Novembru 2017, maizumenus tuku 16.00 lokraik, arguidu ho lezada diskute malu kona-ba arguidu deskonfia lezada ba mane seluk, nune'e arguidu tuku dala ida iha lezada nia kabun, tebe dala ida iha lezada nia kelen no rezulta lezada monu ba rai, hafoin arguidu kontinua silu lezada nia ain. Arguidu la'os foin primeiravés baku lezada, maibé bebeik ona. Iha data no fulan ne'ebé la apuradu maibé iha tinan 2017, arguidu tuku no tebe iha lezada nia isin lolon.

Antes ne'e iha data no fulan ne'ebé la apuradu maibé iha tinan 2016, arguidu tuku dala barak iha lezada nia kanuruk.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal tinan 2 to'o tinan 6 no konjuga ho artigu 2, 3, 35 no artigu 36 LKVD.

Produsaun ba prova sira

Iha julgamentu, arguidu konfesa faktus hotu iha akuzasaun, arguidu deklara katak forma uma kain ho lezada iha tinan 1995, iha oan nain sia. Arguidu hatutan katak depoisde akontesimentu 19 Novembru 2017, lezada ba hela tiha ho lezada nia familia no arguidu ba bolu lezada atu moris hamutuk fali, maibé lezada lakohi moris hamutuk ona ho arguidu no agora dadauk labarik nain sia hela hamutuk ho arguidu no arguidu mak sustenta. Liután arguidu deklara katak arrende ona nia hahalok no foin primeiravés mai hatan iha tribunál.

Iha parte seluk lezada konfirma faktus hotu iha akuzasaun, lezada mós deklara katak iha akontesimentu ikus lezada diside atu lakohi moris hamutuk ona ho arguidu, tanba komesa lezada no arguidu forma uma kain arguidu sempre halo agresaun hasoru lezada.

Alegasaun final

Prokuradór haktuir katak arguidu provadu komete krime maus tratus hasoru lezada bazeia ba konfisaun arguidu nian no deklarasaun hosi lezada, prokuradór deklara katak durante moris hamutuk arguidu sempre halo agresaun hasoru lezada, nune'e lezada deside hodi moris separa hosi arguidu. Tanba ne'e husu ba tribunál atu kondena arguidu ho pena prizaun tinan rua suspende ba tinan tolu.

Enkuantu defeza haktuir katak arguidu konfesa faktus hotu iha akuzasaun, hakarak diak malu fali ho lezada, maibé lezada mak lakohi, arrepende ona nia hahalok no foin primeiravés mai hatan iha tribunal. Tanba ne'e husu ba tribunal fó pena ne'ebé adekuadu ba arguidu.

Desizaun

Tribunál prova katak arguidu provadu komete krime hasoru lezada. Bazeia ba faktu provadu hirak ne'e no sirkunstánsia atenuante sira hotu hanesan arguidu konfesa, arrepende ona nia hahalok, foin primeiravés mai hatan iha tribunal, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

4. Krime ofensa ba integridade física simples ho natureza violência doméstica

Nú. Prosesu : 0053/17.BCBCV
Kompozisaun Tribunál : Singular
Juis : Dra. Ersilia de Jesus
Prokuradór : Dr. Gustavo A. M. da Silva
Defeza : Dr. Antonio Fernandes
Tipu pena : Pena prizaun fulan 6 suspende ba tinan 1

Iha 10 Dezembru 2018, Tribunál Distritál Baucau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu FF hasoru nia feen, iha Distritu Baucau.

Akuzasaun prokuradór

Prokuradór akuza katak iha 28 Agostu 2017, tuku 18.00 loraik, arguidu ho lezada diskute malu, wainhira arguidu husu osan kareta nian ba lezada, maibé lezada hatan katak la hatene, nune'e arguidu basa dala rua iha lezada nia oin no rezulta lezada nia inus ran no matan metan. Arguidu kontinua tebe dala ida iha lezada nian hirus matan no rezulta lezada sofre moras maka'as iha lezada nia hirus matan.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha julgamentu arguidu konfesa faktus hotu iha akuzasaun no deklarata katak arrepende ona nia hahalok, diak malu ona ho lezada no promete sei la komete tan krime hanesan hasoru lezada iha futuro.

Iha parte seluk lezada konfirma faktus hotu iha akuzasaun no deklarata katak depoisde akontesimentu ne'e diak malu ona ho arguidu no arguidu la baku ona lezada.

Alegasaun final

Prokuradór konsidera arguidu komete duni krime hasoru lezada bazeia ba konfisaun arguidu nian no deklarasaun hosi lezada. Atu evita kazu hanesan akontese tan iha futuru, husu ba tribunál atu kondena arguidu tuir konviksaun tribunál nian.

Enkuantu, defeza husu ba tribunál atu fó pena ne'ebé justu ba arguidu tanba arguidu konfesa, arrepende ona nia hahalok no promete sei la komete tan krime hanesan hasoru lezada iha futuru.

Desizaun

Tribunál prova katak arguidu tebe dala ida iha lezada nia kotuk laran no kaer lezada nia fuuk dulas ba mai no rezulta lezada monu ba rai. Bazeia ba prova sira ne'e, tribunál konklui prosesu ne'e no kondena arguidu ho pena prizaun fulan neen suspende ba tinan ida.

5. Krime abuzu konfiansa agravadu

Nú. Prosesu	: 0025/16.PDBAU
Kompozisaun Tribunál	: Koletivu
Juis	: Dr. Jose Goncalves Dr. Afonso Carmona Dr. Jose Escurial
Prokuradór	: Dr. Gustavo A. M. da Silva
Defeza	: Dr. Anotonio Fernandes
Tipu pena	: Absolve

Iha 14 Dezembru 2018, Tribunál Distritál Baucau prezide julgamentu leitura akordaun ba krime abuzu konfiansa agravadu ne'ebé envolve arguidu Manuel da Gama hasoru partidu Frenti Mudansa, iha Distritu Lautem.

Akuzasaun prokurador

Prokuradór akuza katak iha 17 Janeiru 2016, arguidu hamutuk ho kordenador partidu Frenti Mudansa, simu motor partidu nian hosi presidente partidu iha Dili ho marka Honda mega pro ho sapa matrikula H.2195 motorizada refere ho folin US\$2.000.00. Depoisde simu tiha motor ne'e, arguidu la uza ba atividade partidu nian, maibé uza fali ba interese pesoal. Bainhira presidente partidu husu ba arguidu atu entrega motor partidu nian, maibé arguidu la entrega no kontinua uza ba interese pesoal.

Prokuradór akuza arguidu kontra artigu 257 Kódigu Penál kona-ba krime abuza konfiansa agravadu ho nia moldura penal tinan 2 too tinan 8.

Produsaun ba prova sira

Durante julgamentu, arguidu deklara katak arguidu nu'udar Komisariu Politika Nasional no kordenador partidu Frenti Mudansa Distritu Lautem. Iha 17 Janeiru 2016 arguidu hamutuk ho testemuña simu motor iha sede nasional partidu nian iha Dili. Depoisde simu tiha motor arguidu uza motor refere ba atividade partidu nian, tanba testemuña ho nia maluk sira seluk afilia hotu ona ba partidu seluk, testemuña agora la iha relasaun ho partidu Frenti Mudansa bazeia ba despaixu ne'ebé arguidu simu. Arguidu mós deklara katak, foin primeiravés mai hatan iha tribunál.

Testemuña Calistro deklara katak testemuña hamutuk ho arguidu mak simu motor iha sede nasional partidu Frenti Mudansa nian iha Dili. Bainhira fila mai Lautem arguidu la entrega motor refere ba testemuña no aktividade partidu nian mós ladun lao, tanba testemuña lakon kontaktu ho arguidu no testemuña la hatene arguidu uza motor ne'e ba atividade saida.

Alegasaun final

Prokuradór haktuir katak iha produsaun ba prova mosu deklarasaun ne'ebé diferente entre arguidu no testemuña, tanba ne'e husu ba tribunál atu kondena arguidu tuir konviksaun tribunál nian.

Enkuantu defeza husu ba tribunal atu absolve arguidu hosi prosesu ne'e, tanba testemuña rasik nian pozisaun iha partidu laran la iha no arguidu mós deklara ba tribunál katak motorizada refere arguidu uza ba aktividade partidu nian.

Desizaun

Depoizde avalia faktu hotu, tribunál la produs faktu sira ne'ebé konstitui ba krime refere, nune'e tribunál konklui hodi diside absolve arguidu hosi prosesu.

6. Krime ofensa ba integridade física simples ho natureza violência doméstica

Nú. Prosesu : 0103/18. BCBCV
Kompozisaun Tribunál : Singulár
Juis : Dr. Afonso Carmona
Prokuradór : Dra. Ivonia Maria Guterres
Defeza : Dr. Jose M. Guterres
Tipu pena : Pena prizaun fulan 9 suspende ba tinan 2

Iha 14 Dezembru 2018, Tribunál Distritál Baucau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu DdCB hasoru nia nia feen, iha Distritu Baucau.

Akuzasaun Prokuradór

Prokuradór akuza katak iha 26 Juñu 2018, tuku 20.00 kalan, arguidu basa dala ida iha lezada nian matan rezulta lezada monu ba rai. Bainhira lezada hamrik atu ko'us fali labarik atu halai ba viziñu nia uma, maibé arguidu la autoriza, nune'e sira hadau malu labarik no telefone, arguidu kontinua tebe dala rua iha lezada nia matan parte karuk.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak arrepende ona nia hahalok, diak malu ona ho lezada, maibé agora hela ketak-ketak. Arguidu mós deklara katak antes ne'e arguidu iha ona antesendente kriminál ho kazu ne'ebé mak hanesan no tribunál kondena ona arguidu ho pena multa. Maibé arguidu mós promete sei la komete tan krime hanesan hasoru lezada iha futuro.

Iha parte seluk lezada konfirma faktus hotu iha akuzasaun no deklarata katak agora seidauk diak malu ho arguidu tanba lakohi moris hamutuk ona ho arguidu, tanba durante moris hamutuk arguidu sempre halo agresaun hasoru lezada no depoisde problema ne'e arguidu la halo tuir ninia obrigasaun nu'udar xefe familia.

Alegasaun final

Prokurador mantein nia akuzasaun no konsidera arguidu la iha arrendimentu ba ninia hahalok, tanba antes ne'e tribunál kondena ona arguidu ba krime hanesan no lezada mós lakohi atu moris hamutuk ho arguidu. Tanba arguidu sempre halo agresaun hasoru lezada ne'ebé tuir loloos tenke hetan protesau hosi arguidu. Tanba ne'e husu ba tribunál atu kondena arguidu ho pena prizaun fulan neen suspende ba tinan rua.

Enkuantu, defeza husu ba tribunál atu aplika pena ne'ebé adekua ba arguidu bazeia ba konsiderasaun sira katak, arguidu konfesa, arrende ona nia hahalok no promete sei la komete tan krime hanesan iha futuro.

Desizaun

Tribunál prova katak arguidu komete duni faktu sira iha akuzasaun prokurador nian. Bazeia ba prova sira ne'e, tribunál konklui no kondena arguidu ho pena prizaun fulan sia suspende ba tinan rua no selu mós kustu judisial US\$20.00.

7. Krime ofensa ba integridade fizika simples ho natureza violéncia doméstika

Nú. Prosesu	: 0032/18. MNMNT
Kompozisaun Tribunál	: Singulár
Juis	: Dr. Jose Goncalves
Prokurador	: Dr. Luis H. Rangel da Cruz
Defeza	: Dr. Jose M. Guterres
Tipu pena	: Pena multa

Iha 17 Dezembru 2018, Tribunál Distritál Baucau liuhosi tribunál movel iha Distritu Manatuto prezide julgamentu leitura sentensa ba krime ofensa ba integridade fizika simples ho natureza violéncia doméstika ne'ebé envolve arguidu AMR hasoru nia feen, iha Distritu Manatuto.

Akuzasaun Prokurador

Prokurador akuza katak iha 30 Maiu 2018, arguidu ho lezada diskute malu kona-ba arguidu deskonfia lezada iha relasaun amante ho mane seluk. Hafoin arguidu tuku dala ida iha lezada nia kotuk laran no tebe dala ida iha lezada nia kidan no kaer lezada nia fuuk hodi rasta ba mai.

Prokurador akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa fikus hotu iha akuzasaun, arguidu deklarata katak fila hosi sela polisia diak malu fali ho lezada no arguidu husu ona deskulpa ba lezada. Arguidu deklarata katak foin primeiravés mai hatan iha tribunál, arrepende ona nia hahalok no promete sei la komete tan asaun hanesan hasoru kualker ema iha futuru. Aleinde ne'e arguidu mós deklarata katak nu'udar motorista ho salariu kada fulan US\$120.00.

Iha parte seluk lezada konfirma faktus hotu iha akuzasaun no deklarata katak depoisde akontesimentu ne'e diak malu kedas ho arguidu.

Alegasaun final

Prokuradór argumenta katak tuir loloos arguidu mak tenke asegura protesaun ne'ebé diak ba lezada. Tanba ne'e prokurador deklarata katak maske arguidu kofesa totalmente ba faktu sira iha akuzasaun no arrepende ona ninia hahalok sira, husu ba tribunál atu kondena arguidu ho pena prizaun fulan haat no suspende ba tinan ida no selu mós kustu judisiál US\$10.00.

Iha parte seluk defeza haktuir katak arguidu konfesa faktus hotu iha akuzasaun, arrepende ona nia hahalok, foin primeiravés mai hatan iha tribunál no diak malu ona ho lezada. Tanba ne'e husu ba tribunál atu aplika pena ne'ebé adekuadu ba arguidu.

Desizaun

Tribunál prova katak arguidu komete duni krime hasoru lezada, tuir faktu sira iha akuzasaun prokuradór nian. Bazeia ba faktu provadu sira ne'e no tetu mós ba sirkunstánsia hotu-hotu ne'ebé partense ba kazu ne'e, tribunál kondena arguidu ho pena multa US\$90.00 ne'ebé sei selu US\$ 1.00 kada loron durante loron 90. Tribunál mós fiksa pena alternativa durante loron 60 prizaun, wainhira arguidu la kumpri pena multa refere.

8. Krime ofensa ba integridade física simples ho natureza violénsia doméstika

Nú. Prosesu : 0016/18. MNLCL
Kompozisaun Tribunál : Singulár
Juis : Dr. Jose Goncalves
Prokuradór : Dr. Luis H. Rangel da Cruz
Defeza : Dr. Jose M. Guterres
Tipu pena : Pena prizaun fulan 5 suspende ba tinan ida

Iha 18 Dezembru 2018, Tribunál Distritál Baucau liuhosi tribunál movel iha Distritu Manatuto prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AMRP hasoru nia oan JC ho idade 27, iha Distritu Manatuto.

Akuzasaun Prokuradór

Prokuradór akuza katak iha 4 Setembru 2018, tuku 19.30 kalan, arguidu haruka lezadu ba kesi manu, maibé lezadu lakohi, nune'e arguidu hakbesik ba lezadu hodi tuku dala ida iha lezadu nia ibun, tuku dala rua iha lezadu nia ulun parte loos no basa dala ida iha lezadu nia matan parte loos. Aktu ne'e rezulta lezadu sofre kanek iha lezadu nia ibun.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa totalmente ba faktus hotu iha akuzasaun, arguidu mós deklara ba tribunál katak depoisde akontesimentu ne'e liu tiha loron ida mak diak malu fali ho lezadu, arrepende ona nia hahalok akontese to'o agora la baku ona lezadu no foin primeiravés mai hatan iha tribunál.

Iha parte seluk lezadu konfirma faktus sira iha akuzasaun no deklara katak depoisde akontesimentu ne'e to'o agora arguidu la baku ona lezadu.

Alegasaun final

Prokuradór haktuir katak arguidu provadu komete krime hasoru lezadu bazeia ba konfisaun arguidu nian no deklarasaun hosi lezada. Tanba ne'e husu ba tribunál atu kondena arguidu ho pena prizaun fulan tolu suspende ba tinan ida.

Enkuantu defeza haktuir katak arguidu konfesa faktus hotu iha akuzasaun, arrepende ona nia hahalok, diak malu ona ho lezada. Tanba ne'e husu ba Tribunál aplika pena multa ba arguidu tuir arguidu nia kapasidade ekonomia.

Desizaun

Depoisde avalia faktu provadu sira ne'ebé produs durante julgamentu tribunál konsidera akuzasaun prokuradór nian provadu katak arguidu halo agresaun fiziku hasoru nia oan. Bazeia ba konsiderasaun hirak ne'e, tribunál konklui prosesu ne'e no kondena arguidu ho pena prizaun fulan lima suspende ba tinan ida no selu mós kustu judisiál US\$10.00

9. Krime ofensa ba integridade fizika simples ho natureza violénsia doméstika

Nú. Prosesu	: 0035/18. PDBAU
Kompozisaun Tribunál	: Singulár
Juis	: Dr. Jose Goncalves
Prokuradór	: Dr. Luis H. Rangel da Cruz
Defeza	: Dr. Jose M. Guterres
Tipu pena	: Pena prizaun fulan 5 suspende ba tinan 1

Iha 18 Dezembru 2018, Tribunál Distritál Baucau liuhosi tribunál movel iha Distritu Manatuto prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguida BMGC hasoru nia laen, iha Distritu Manatuto.

Akuzasaun Prokuradór

Prokuradór akuza katak iha 16 Setembru 2017, tuku 15:00 lokraik, lezadu ba tuir arguida ne'ebé buka hela boek iha mota laran. Depoisde buka hotu boek lezadu dehan ba arguida atu fila ona, tanba sira nia hela fatin dook no sira nia oan mós moras hela. Wainhira to'o iha dalan klaran arguida tolok lezadu, nune'e lezadu fakar hotu tiha boek ne'ebé arguida ho lezada hetan, nune'e

arguida foti fatuk tuda dala ida iha lezadu nia ulun no rezulta lezadu nia ulun kanek no ran sai barak, no lezadu konsege ba halo tratamentu iha Centru Saude Laleia.

Prokuradór akuza arguida kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa.

Produsaun ba prova sira

Iha prosesu julgamentu, arguida konfesa faktus hotu iha akuzasaun no deklarata katak depoisde akontesimentu ne'e lezadu ba hela tiha iha lezadu nia familia iha Lalini Viqueque durante fulan walu no arguida mak kontaktu fali lezadu liuhosi telefone, nune'e arguida ho lezadu diak malu fali too agora.

Arguida mós deklarata katak foin primeiravés mai hatan iha tribunál, arrepende ona nia hahalok no promete sei la komete tan krime hanesan hasoru lezadu iha futuru. Iha parte seluk lezadu konfirma faktus hotu iha akuzasaun. Lezadu mós deklarata katak depoisde akontesimentu ne'e lezadu ba hela ho nia familia iha Lalini Viqueque durante fulan walu, hafoin sira diak malu fali no hela hamutuk to'o agora.

Alegasaun finál

Prokuradór haktuir katak bazeia ba konfiasaun arguida nian no deklarasaun hosi lezadu prova katak arguida komete duni krime hasoru lezadu. Tanba ne'e prokuradór mantein nia akuzasaun no husu ba tribunál atu kondena arguida ho pena prizaun fulan tolu suspende ba tinan ida.

Iha parte seluk defeza haktuir katak arguida konfesa faktus hotu iha akuzasaun, arrepende ona nia hahalok, foin primeiravés mai hatan iha tribunál no diak malu ona ho lezada. Tanba ne'e husu ba tribunál atu aplika pena ne'ebé adekua ba arguida.

Desizaun

Tribunál prova katak arguida lori fatuk tuda lezadu no lezadu sofre kanek iha ulun no konsege halo tratamentu iha sentru saúde. Bazeia ba faktu provadu sira ne'e inklui konsiderasaun ba iha sirkunstánsia hotu-hotu ne'ebé produs durante julgamentu tribunál kondena arguida ho pena prizaun fulan tolu suspende ba tinan ida.

10. Krime obstrusaun ba autoridade pública

Nú. Prosesu	: 0003/17. LALRO
Kompozisaun Tribunál	: Koletivu
Juis	: Dr. Jose Escurial Dr. Jose Goncalves Dr. Hugo da Cruz Pui
Prokuradór	: Dr. Luis H. Rangel da Cruz
Defeza	: Dr. Jose M. Guterres
Tipu pena	: Pena prizaun tinan 2 suspende ba tinan 2

Iha 19 Dezembru 2018, Tribunál Distritál Baucau prezide julgamentu leitura akordaun ba krime obstrusaun ba autoridade pública ne'ebé envolve arguidu Julio Pinto no Fortunato Pinto hasoru ajente polisia Thomas da Costa, iha Sub-distritu Luro, Distritu Lospalos.

Akuzasaun prokuradór

Prokuradór akuza katak iha 25 Abril 2017, tuku 10.30 dader, lezadu ne'ebé nu'udar ajente polisia halo intervensaun ba iha problema ne'ebé akontese entre jovem sira hosi Suku Barikafa no Suku Kota-mutu. Wainhira lezadu halo hela identifikaun ba jovem sira ne'ebé halo problema, derepente arguidu Fortunato Pinto no Julio Pinto kaer katana atu taa lezadu, maibé la konsege tanba lezadu hasai stik hodi baku arguidu Fortunato Pinto nia liman no rezulta katana monu tiha ba rai. Bainhira arguidu Julio Pinto atu foti tan katana ne'ebé monu hela iha rai, arguidu haree ajente sira seluk karega ona pistola nune'e arguidu Julio Pinto no Fortunato Pinto halai tiha hosi fatin akontesimentu. Arguidu sira nai hahalok ne'e impede polisia sira la hala'o sira funsaun ho diak.

Prokuradór akuza arguidu sira kontra artigu 243 n^o1 Kódigu Penál kona-ba krime obstrusaun ba autoridade pública ho nia moldura penal tinan 2 tinan to'o tinan 6.

Produsaun ba provas sira

Iha prosesu julgamentu arguidu Julio Pinto deklara katak momentu ne'e arguidu la hatene ema asaltu malu derepente polisia sira ba kaer arguidu nia alin naran Mariano, tanba ne'e arguidu koalia netik katak labarik sala saida karik koalia deit. Arguidu deklara katak nia haree ninia alin Fortunato Pinto kaer hela katana, nune'e arguidu foti tiha katana refere, no la'os atu ba taa polisia. Enkuantu arguidu Fortunato Pinto deklara katak katana ne'e la'os arguidu nian, maibé nia rian mak rai hela iha kareta laran tanba sira mós prepara atu ba partisipa serimonia kultural no la'os atu taa polisia. Iha parte seluk lezadu konfirma faktus hotu iha akuzasaun.

Testemuña Fernando da Gama depoimenta katak testemuña sei iha kareta leten haree lezadu lori stik baku dala rua ba arguidu Fortunato Pinto nia liman no rezulta katan monu tun, hafoin testemuna foti tiha katana.

Alegasaun final

Prokuradór haktuir katak mezmu arguidu sira koko atu bosok tribunál, maibé lezadu konfirma no reforsa mós hosi testemuña. Tanba ne'e prokuradór konsidera arguidu sira provadu halo impedimentu ba polisia nia servisu ne'ebé halo identifikaun. Prokuradór mantein nia akuzasaun no husu ba tribunál atu kondena arguidu sira ho pena prizaun tinan rua suspende ba tinan rua.

Iha parte seluk defeza haktuir katak bazeia ba deklarasaun arguidu sira nian katak arguidu sira la intensaun atu halo intervensaun ba polisia nia servisu. Tanba ne'e husu ba tribunál atu fo justisa ba arguidu sira.

Desizaun

Depoisde avalia faktu hotu, tribunál prova katak arguidu sira komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu sira ho pena prizaun tinan rua suspende ba tinan rua.

11. Krime obstrusaun ba autoridade pública

Nú. Prosesu : 0011/17. VQWTL
Kompozisaun Tribunál : Koletivu
Juis : Dr. Jose Escurial
Dr. Jose Goncalves
Dr. Hugo da Cruz Pui
Prokuradór : Dr. Domingos Goveia Barreto
Defeza : Dra. Alexandrina de Sousa (advogada ECM)
Tipu pena : Pena prizaun tinan 2 suspende ba tinan 2

Iha 19 Dezembru 2018, Tribunál Distritál Baucau prezide julgamentu leitura akordaun ba krime obstrusaun ba autoridade pública ne'ebé envolve arguidu Luis Francisco hasoru Funsionariu EDTL Joao Z. de Jesus dos Santos, iha Sub-distritu Uatulari, Distritu Viqueque.

Akuzasaun prokuradór

Prokuradór akuza katak iha 30 Maiu 2017, lezadu nu'udar xefe inspeksaun ho tekniku balun halo inspeksaun iha Suku Karau-balun. Iha inspeksaun ne'e lezadu ho ekipa halo dezliga tiha ba liña eletrisidade ne'ebé ilegal hamutuk uma tolu inklui arguidu nian uma. Nune'e arguidu nia alin telefone arguidu no arguidu to'o mai iha uma hodi tuku dala ida iha lezadu nia hasan parte karuk. Aktu ne'e rezulta lezadu ho nia ekipa EDTL la kontinua halo inspeksaun.

Prokuradór akuza arguidu kontra artigu 243 n^o1 Kódigu Penál kona-ba krime obstrusaun ba autoridade pública ho nia moldura penal tinan 2 tinan to'o tinan 6.

Produsaun ba provasa sira

Iha prosesu julgamentu, arguidu konfesa fikus hotu iha akuzasaun, arguidu deklara katak arguidu komete aktu ne'e haoru lezadu, tanba wainhira lezadu sira ba halo inspeksaun la fó hatene ba arguidu. Arguidu mós deklara katak foin primeiravés mai hatan iha tribunál, arrende ona nia hahalok no promete sei la komete tan krime iha futuru.

Iha parte seluk lezadu konfirma faktus hotu iha akuzasaun no deklara katak ho agresaun arguidu nian ekipa EDTL la kontinua halo inspeksaun too remata.

Testemuña Flacido da Silva nu'udar arguidu nia viziñu depoimenta katak, wainhira EDTL halo inspeksaun no hetan katak arguidu liga eletrisidae ilegal, nune'e ekipa sira desliga tiha, derepente arguidu mosu mai tuku lezadu no ekipa EDTL sira hapara sira nia inspeksaun.

Alegasaun final

Prokuradór haktuir katak bazeia ba konfisaun arguidu nian no deklarasaun lezadu nian no testemuña nian hatudu katak arguidu provadu komete krime obstrusaun ba autoridade pública ka arguidu nia hahalok halo lezadu ho nia ekipa EDTL la kontinua servisu. Tanba ne'e prokuradór mantein nia akuzasaun no husu ba tribunál atu kondena arguidu ho pena prizaun tinan rua fulan neen no suspende ba tinan tinan rua fulan neen.

Iha parte seluk defeza haktuir katak arguidu konfesa faktus hotu iha akuzasaun, arrepende ona nia hahalok, foin primeiravés mai hatan iha tribunál. Tanba ne'e husu ba tribunál atu aplika pena ne'ebé adekuadu ba arguidu.

Desizaun

Depoide avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun tinan rua suspende ba tinan rua.

12. Krime ofensa ba integridade fízika simples ho natureza violénsia doméstika

Nú. Prosesu : 0538/13. PDBAU
Kompozisaun Tribunál : Singulár
Juis : Dr. Jose Escurial
Prokuradór : Dr. Domingos Goveia Barreto
Defeza : Dr. Jose M. Guterres
Tipu pena : Pena prizaun fulan 3 suspende ba tinan 1

Iha 19 Dezembru 2018, Tribunál Distritál Baucau prezide julgamentu leitura sentensa edital, ba krime ofensa ba integridade fízika simples ho natureza violénsia doméstika ne'ebé envolve arguidu JV (edital) hasoru nia feen, iha Distritu Viqueque.

Akuzasaun Prokuradór

Prokuradór akuza katak, iha 27 Outubro 2013, tuku 00.00 kalan, arguidu tuku dala ida iha lezada nian kabaas parte loos, arguidu lori sai kulsaun ba toba iha liur nune'e lezada dehan netik kalan ona toba uma laran no arguidu kontinua dudu lezada monu tun ba rai.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu tribunál labele rona arguidu nia deklarasaun, tanba arguidu editál. Iha parte seluk lezada konfirma faktus hotu iha akuzasaun no deklarata katak depoide akontesimentu ne'e to'ogora arguidu la fila ba uma no lezada mós la hatene arguidu agora iha ne'ebé.

Alegasaun final

Prokuradór haktuir katak, mezmú arguidu halo notifikasaun editál, maibé lezada konfirma faktus hotu iha akuzasaun, signifika katak arguidu komete duni faktu ne'e hasoru lezada. Maske depoide akontesimentu ne'e arguidu ho lezada moris separa ona, husu ba tribunál atu kondena arguidu ho pena prizaun fulan neen suspende ba tinan ida.

Iha parte seluk defeza haktuir katak iha julgamentu sein prezensa arguidu nian, tanba arguidu edital, maibé bazeia ba produsaun prova husu ba tribunál atu aplika pena ne'ebé adekuadu ba arguidu.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun fulan tolu suspende ba tinan ida.

13. Krime ofensa ba integridade fízika simples ho natureza violénsia doméstika

Nú. Prosesu : 0122/18. BCBCV
Kompozisaun Tribunál : Singulár
Juis : Dr. Jose Escurial
Prokuradór : Dr. Gustavo A. M. da Silva
Defeza : Dr. Jose M. Guterres
Tipu pena : Pena prizaun tinan 1 suspende ba tinan 1

Iha 20 Dezembru 2018, Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu NDSF hasoru nia nia feen, iha Distritu Baucau.

Akuzasaun Prokuradór

Prokuradór akuza katak, iha 17 Setembru 2018, tuku 20.00 kalan, hafoin han hotu lezada haree mensagem ida tama iha arguidu nia telefone katak "ha'u isin rua todan ona." Depoiz haree tiha mensagem arguidu ho lezada diskute malu, arguidu tebe dala ida iha lezada nia kidan, tuku dala ida iha lezada nia reen-toos no rezulta lezada sofre moras no bubu iha lezada nia kidan no reen-toos. Arguidu kontinua tama ba iha kuartu laran foti tudik atu sona lezada, maibé lakonsege tanba arguidu rasik mak hapara ninia asaun ne'e.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa fikus hotu iha akuzasaun, arguidu deklara katak foin primeiravés baku lezada no primeiravés mai hatan iha tribunál. Arguidu mós deklara katak arrepende ona nia hahalok, diak malu ona ho lezada no promete sei la komete tan krime hanesan hasoru lezada iha futuru. Iha parte seluk lezada konfirma faktus hotu iha akuzasaun no deklara katak diak malu ona ho arguidu.

Alegasaun finál

Prokuradór haktuir katak bazeia ba konfisaun arguidu nian no deklarasaun lezada nian hatudu katak arguidu provadu halo agresau fízika hasoru lezada ne'ebé nu'udar nia feen. Tanba ne'e prokuradór mantein nia akuzasaun no husu ba tribunál atu kondena arguidu tuir konviksaun tribunál nian.

Iha parte seluk defeza haktuir katak arguidu konfesa faktus hotu iha akuzasaun, arrepende ona nia hahalok, foin primeiravés mai hatan iha tribunál no diak malu ona ho lezada. Tanba ne'e husu ba tribunál atu aplika pena ne'ebé adekuadu ba arguidu.

Desizaun

Tribunál prova katak arguida komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, diak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

14. Krime ofensa ba integridade fizika simples ho natureza violénsia doméstika

Nú. Prosesu : 0054/18.BCSIC
Kompozisaun Tribunál : Singulár
Juis : Dr. Jose Escurial
Prokuradór : Dr. Gustavo M. da Silva
Defeza : Dr. Jose M. Guterres
Tipu pena : Pena prizaun fulan 6 suspende ba tinan 1

Iha 20 Dezembru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguida Jd CB hasoru nia oan mane ho idade 29, iha Distritu Baucau.

Akuzasaun Prokuradór

Prokuradór akuza katak iha 30 Agostu 2018, tuku 16.00 lokraik, arguida foti ai-pedasuk baku dala neen iha lezadu nia ain-tuur parte karuk no loos, baku dala rua iha lezadu nia kabaas parte karuk no loos no baku dala ida iha lezada nia ain no rezulta lezada sofre kanek iha lezada nia ain.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu arguida konfesa integralmente ba faktus hotu iha akuzasaun, arguida deklara ba iha tribunál katak nia halo agresaun, tanba lezadu baku fali manu ne'ebé arguida hakiak no tolok arguida. Arguida mós deklara katak diak malu ona ho lezadu no arrepende ona nia hahalok. Iha parte seluk lazadu mós konfirma faktu sira iha akuzasaun no deklara katak diak malu ona ho arguida.

Alegasaun finál

Prokuradór mantein nia akuzasaun no konsidera arguida provadu komete krime hasoru lezadu, tanba ne'e husu ba tribunál atu kondena arguida tuir konviksaun tribunál nian.

Enkuantu, defeza husu ba tribunál atu fó pena ne'ebé adekuada ba arguida tanba haree ba sirkunstánsia atenuante sira hanesan arguida konfesa, arrepende ona nia hahalok no diak malu ona ho lezadu.

Desizaun

Depoide avalia faktu hotu, tribunál prova katak arguida komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguida

konfesa, arrepende ona ninia hahalok, diak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguida ho pena prizaun fulan neen suspende ba tinan ida.

15. Krime ofensa ba integridade física simples ho natureza violência doméstica

Nú. Prosesu : 0300/13.PDBAU
Kompozisaun Tribunál : Singulár
Juis : Dr. Jose Escurial
Prokuradór : Dr. Domingos Goveia Barreto
Defeza : Dr. Jose M. Guterres
Tipu pena : Pena prizaun fulan 6 suspende ba tinan 1

Iha 20 Dezembru 2018, Tribunál Distritál Baucau prezide julgamentu leitura sentensa, ba krime ofensa ba integridade física simples ho natureza violência doméstica ne'ebé envolve arguidu CF hasoru nia feen (edital), iha Distritu Baucau.

Akuzasaun Prokuradór

Prokuradór akuza katak iha 5 Juñu 2013, tuku 16.00 lokraik, lezada toba hela iha kuartu laran no fó hela susu-been ba sira nia oan ne'ebé sei ki'ik. Derepente arguidu ho kondisaun lanu dada lezada nia fuuk, tuku no tebe dala barak iha lezada nia kotuk laran no kidan no rezulta lezada sofre moras no bubu iha lezada nia kotuk laran no kidan.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak depoisde akontesimentu ne'e lezada halai sai hosi uma ho sira nia oan ida to'o agora la mosu no arguidu mós buka lezada ho nia oan to'o agora la hetan. Arguidu deklarata katak foin primeiravés baku lezada, arrepende ona nia hahalok no promete sei la komete tan krime ne'e iha futuro.

Alegasaun final

Prokuradór mantein nia akuzasaun no konsidera arguidu provadu komete krime hasoru lezada, mezmua la hetan lezada ninia diresaun (editál), maibé arguidu konfesa faktu hotu. Tanba ne'e husu ba tribunál atu kondena arguidu ho pena prizaun fulan haat suspende ba tinan ida.

Enkuantu, defeza husu ba tribunál atu aplika pena ne'ebé adekua ba arguidu ho konsiderasaun sira katak, arguidu konfesa, arrepende ona nia hahalok no promete sei la komete tan krime hanesan iha futuro.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun fulan neen suspende ba tinan ida.

16. Krime ofensa ba integridade fizika simples ho natureza violénsia doméstika

Nú. Prosesu : 0048/18. BCBCV
Kompozisaun Tribunál : Singulár
Juis : Dr. Jose Escurial
Prokuradór : Dr. Domingos Goveia Barreto
Defeza : Dr. Jose M. Guterres
Tipu pena : Pena prizaun 6 suspende ba tinan 1

Iha 20 Dezembru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu MSdS hasoru nia feen, iha Distritu Baucau.

Akuzasaun Prokuradór

Prokuradór akuza katak iha 20 Marsu 2018, tuku 18.30 lokraik, arguidu tuku dala ida iha lezada nia reen-toos, tuku dala ida iha lezada nia kanuruk no tuku dala ida iha lezada nia kotuk laran.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa faktus hotu iha akuzasaun, arguidu rasik diak malu fali ho lezada no agora hela hamutuk nu'udar feen ho laen, no desde akontese to'ogora la baku ona lezada. Arguidu arrepende ona nia hahalok, foin primeiravés mai hatan iha tribunál.

Iha parte seluk lezada konfirma faktus hotu iha akuzasaun no deklara katak iha akontesimentu ne'e lezada konsege ba toba kalan ida uma mahon Baucau. Iha loron tuir mai polisia lori fali lezada ba uma no diak malu kedas ho arguidu to'ogora arguidu la baku ona lezada.

Alegasaun final

Prokuradór konsidera arguidu komete duni krime hasoru lezada no konsidera mós sirkunstánsia atenuante sira hanesan arguidu konfesa no arrepende ona nia hahalok. Maibé atu prevene arguidu la repete tan krime hanesan iha futuru, husu ba tribunál atu kondena arguidu ho pena prizaun fulan haat suspende ba tinan ida.

Enkuantu defeza subliña liután katak arguidu konfesa, arrepende ona nia hahalok no promete sei la komete tan krime hanesan iha futuru. Tanba ne'e husu ba tribunál atu aplika pena ne'ebé adekua ba arguidu.

Desizaun

Depoide avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun fulan neen suspende ba tinan ida.

17. Krime omisídiu agravadu ho forma tentada no krime armas brankas

Nú. Prosesu : 0059/17.LASIK
Kompozisaun Tribunál : Koletivu
Juis : Dr. Jose Quintão
Dr. Antonio Fonseca
Dr. Hugo da Cruz Pui
Prokuradór : Dr. Luis H. Rangel da Cruz
Defeza : Dr. Sidonio M. Sarmiento
Tipu pena : Pena prizaun tinan 7 fulan 6

Iha 20 Dezembru 2018, Tribunál Distritál Baucau liuhosi tribunál movel iha Distritu Manatuto prezide julgamentu leitura akordaun ba krime omisídiu simples ho forma tentada no krime armas brankas ne'ebé envolve arguidu Juvencio Soares hasoru nia alin rasik Bazilio da Costa iha Suku Ira-ara, Distritu Lautem.

Akuzasaun prokuradór

Prokuradór akuza katak, Iha 2 Novembru 2017, arguidu ho lezadu diskute malu no arguidu dehan ba lezadu katak “ ó mangame ha'u tetak rahun kedas ó nia inan nian oin lulik no ó nia feen.” Hafoin ida ne'e lezadu fila kotuk hodi la'o daudaun, arguidu tama fali ba uma laran hodi foti samurai no taa dala ida iha lezadu nia kabaas no taa dala ida ba iha lezadu nian ulun no dala iha lezadu nia kotuk laran. Arguidu nia agresaun ne'e rezulta lezada desmaia no monu ba rai no lezadu mós sofre kanek iha lezadu nia kabaas, ulun no kotuk laran.

Prokuradór akuza arguidu kontra artigu 139 Kódigu Penál kona-ba krime omisídiu agravadu ho forma tentada tuir artigu 23 Kódigu Penál no artigu 20 Nú.1 hosi Lei Armas Brankas Nú. 5/2017.

Produsaun ba prova sira

Iha prosesu julgamentu, arguidu konfesa fakus hotu iha akuzasaun no deklarara katak depoisde akontesimentu ne'e arguidu ba entrega an iha polisia. Arguidu mós deklarara katak foin primeiravés mai hatan iha tribunál, arrepende ona nia hahalok tanba halo kanek ona nia alin rasik no promete sei la komete tan kualker krime iha futuro. Iha parte seluk lezadu konfirma faktus hotu iha akuzasaun no deklarara katak diak malu ona ho arguidu.

Alegasaun finál

Prokuradór konsidera arguidu provadu komete krime hasoru nia alin rasik bazeia ba konfisaun arguidu nian no deklarasaun hosi lezadu, tanba ne'e husu ba tribunál atu kondena arguidu ho pena prizaun tinan sanulu resin lima.

Enkuantu defeza haktuir katak arguidu konfesa faktus hotu iha akuzasaun, arrepende ona nia hahalok, foin primeiravés mai hatan iha tribunál no diak malu ona ho lezadu. Tanba ne'e husu ba tribunál aplika pena ne'ebé adekuaudu ba krime omisídiu no ba krime armas brankas husu ba tribunál atu kondena arguidu tuir konviksaun tribunál nian.

Desizaun

Depoisde avalia faktus hotu, tribunál prova katak arguidu komete duni krime tuir faktus sira iha akuzasaun. Bazeia ba faktus provadu sira ne'e no sirkunstánsia atenuante sira hanesan arguidu konfesa, arrepende ona ninia hahalok, foin primeiravés mai hatan iha tribunál, nune'e tribunál

konklui prosesu ne'e no kondena arguidu ba krime omísidiu agravadu ho pena prizaun tinan neen. Enkuantu ba krime armas brankas tribunál kondena arguidu ho pena prizaun tinan haat fulan tolu. Tribunál halo komulasaun juridíku ba krime rua ne'e hodi kondena arguidu ho pena prizaun tinan hitu fulan neen.

18. Krime ofensa ba integridade fízika simples ho natureza violénsia doméstika

Nú. Prosesu : 0067/17.BCSIC
Kompozisaun Tribunál : Singulár
Juis : Dra. Ersilia de Jesus
Prokuradór : Dra. Remizia de fatima da Silva
Defeza : Dr. Antonio Fernandes
Tipu pena : Pena prizaun fulan 6 suspende ba tinan 1 fulan 6

Iha 21 Dezembru 2018, Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CB hasoru nia nia feen, iha Distritu Lautem.

Akuzasaun Prokuradór

Prokuradór akuza katak iha 6 Setembru 2017, tuku 20.00 kalan, arguidu ho lezada diskute malu no arguidu haruka lezada atu sai husi uma, maibé lezada lakohi. Hafoin arguidu tuku dala ida iha lezada nian liman kabun, arguidu uja nuu nia fuan hodi tuda dala ida iha lezada nia kidan no tuku dala ida iha lezada nia kabun. Hafoin lezada halai sai husi uma lori oan nain rua ba hela iha kolega nia uma durante semana tolu hafoin ba hela iha lezada nia inan aman nian uma iha Dili.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova sira

Iha prosesu julgamentu, arguidu konfesa fakus hotu iha akuzasaun, arguidu deklara katak durante moris hamutuk foin primeiravés mai hatan iha tribunál. Liután arguidu deklara katak arrepende ona ninia hahalok, diak malu ona ho lezada no promete sei la komete tan krime hanesan hasoru lezada iha futuro. Iha parte seluk lezada konfirma faktus hotu iha akuzasaun no deklara katak diak malu ona ho arguidu no moris hamutuk hanesan feen ho laen.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no deklarasaun lezada nian. Prokuradór hatutan liután katak kada loron kazu violénsia doméstika sempre aumenta, nune'e atu evita krime hanesan akontese tan iha futuro, husu ba tribunál atu kondena arguidu ho pena prizaun tinan ida suspende ba tinan ida fulan neen.

Iha parte seluk defeza haktuir katak arguidu konfesa faktus hotu iha akuzasaun, arrepende ona nia hahalok, foin primeiravés mai hatan iha tribunál no diak malu ona ho lezada. Tanba ne'e husu ba tribunál atu aplika pena ne'ebé adekuadu ba arguidu.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun fulan neen suspende ba tinan ida fulan neen.

Ba informasaun liután bele kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl

info@jsmp.tl